



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ ՔՆՆՈՂ ԱՆՁ

ք. Երևան

20.01.2020թ.

Ո Ր Ո Շ ՈՒ Մ

ՀՀ գնումների հետ կապված բողոքներ քննող անձի թիվ ԳԲՔԱ-ՆԳ-2019/98

Հայաստանի Հանրապետության գնումների հետ կապված բողոքներ քննող անձը՝ ի դեմս Գրիգոր Ներսիսյանի

Մասնակցությամբ՝ «Սուրբ Գրիգոր Լուսավորիչ ԲԿ» ՓԲԸ-ի ներկայացուցիչներ՝

Մ. Ստեփանյանի (լիազորագիր, տրված՝ 08.01.2020թ.)

Ե. Սարգսյանի (լիազորագիր, տրված՝ 08.01.2020թ.)

«Խաչպար» ՍՊԸ-ի տնօրեն՝ Ս. Բալասանյանի (իրավաբանական անձանց պետական միասնական գրանցամատյանից քաղվածք, գրանցման համար՝ 264.110.05665)

քննելով «Սուրբ Գրիգոր Լուսավորիչ ԲԿ» ՓԲԸ-ի կարիքների համար բժշկական նշանակության ապրանքների ձեռքբերման նպատակով հայտարարված «ՍԳԼ-ԳՀԱՊԶԲ-20/23» ծածկագրով գնանշման հարցման ընթացակարգի շրջանակներում «Խաչպար» ՍՊԸ-ի կողմից 25.12.2019թ. ներկայացված (26.12.2019թ. վարույթ ընդունված) բողոքը (հետայսու նաև՝ ԳԲՔԱ-ՆԳ-2019/98 բողոք), պարզեցի հետևյալը.

1. «Խաչպար» ՍՊԸ-ի ներկայացրած փաստերը, հիմնավորումները և պահանջը.

«Խաչպար» ՍՊԸ-ն 25.12.2019թ. ներկայացրած բողոքով հայտնել է, որ «Սուրբ Գրիգոր Լուսավորիչ ԲԿ» ՓԲԸ-ն (հետայսու նաև՝ Պատվիրատու) բժշկական նշանակության ապրանքների ձեռքբերման նպատակով հայտարարություն է հրապարակել «ՍԳԼ-ԳՀԱՊՁԲ-20/23» ծածկագրով գնանշման հարցման մասին (հետայսու նաև՝ Ընթացակարգ), որը հաստատվել է գնահատող հանձնաժողովի 2019 թ. դեկտեմբերի 23-ի թիվ 1 որոշմամբ, որի Հրավերի թվով 10 չափաբաժիններից «Խաչպար» ՍՊԸ-ն բողոքարկում է 3-րդ և 4-րդ չափաբաժինները (կից փաստաթուղթ թիվ 2, արված նշումները):

Հրավերի «Տեխնիկական Բնութագիր - Գնման Ժամանակացույց» Հավելված թիվ 1-ի «անվանումը» սյունակներում 3-րդ և 4-րդ չափաբաժինների մասերով պահանջվող ապրանքների համար գրված է միևնույն՝ «Դիալիզատոր» անվանումը, իսկ «տեխնիկական բնութագիրը» սյունակներում ներառված պահանջներում՝ այդ 2 ապրանքների համար, առկա է միևնույն՝ «.... մանրազերծման մեթոդը գամմա ճառագայթմամբ» պահանջը:

Համաձայն ՀՀ-ի կողմից վավերացրած Միջպետական Ստանդարտ «ГОСТ ISO 8.651-2016»-ի «Ներածություն» բաժնի երկրորդ պարբերության «.... Ռադիացիոն մանրէազերծումը դա ֆիզիկական պրոցես է, որը կապված է իոնիզացնող ճառագայթմամբ բժշկական պարագաների ճառագայթման հետ: Պարագաները ենթարկվում են ճառագայթման մասնագիտացված ռադիացիոն-տեխնոլոգիական կայանքներում՝ օգտագործելով 60Co կամ 137Cs ռադիոնուկլիդների գամմա ճառագայթման աղբյուրներ կամ էլեկտրոնների արագացուցիչներ, որոնք ստեղծում են (գեներացնում են) էլեկտրոնային կամ արգելակման ճառագայթման փնջեր: Ռադիացիոն մանրէազերծումը ճիշտ կատարելու դեպքում այն հանդիսանում է անվտանգ և հուսալի արդյունաբերական պրոցես: Ռադիացիոն մանրէազերծման գործընթացը հանդիսանում է մեկանգամվա օգտագործման բժշկական նշանակության ապրանքների արտադրության եզրափակիչ փուլը:» սահմանումների՝ բժշկական պարագաների ռադիացիոն մանրէազերծումն իրականացվում է իոնիզացնող ճառագայթներով բժշկական պարագաներին 2 մեթոդներով՝ ճառագայթելով՝ 1. գամմա

ճառագայթման աղբյուրներ, և 2. էլեկտրոնների արագացուցիչներ, որոնք ստեղծում են էլեկտրոնային կամ արգելակման ճառագայթման փնջեր:

Պատվիրատուի կողմից Հրավերի 3-րդ և 4-րդ չափաբաժինների մասերով նշված են բժշկական պարագաների ռադիացիոն մանրէազերծումն իոնիզացնող ճառագայթներով իրականացնող երկու մեթոդներից միայն մեկը՝ «... մանրազերծման մեթոդը գամմա ճառագայթամբ ...», բաց է թողնված 2-րդ մեթոդը, ինչն ամբողջական չէ, հակասում է ՀՀ Կառավարության կողմից ստորագրված «ГОСТ ISO 8.651-2016» Միջպետական Ստանդարտին, ուստի նաև չի համապատասխանում «Գնումների մասին» ՀՀ օրենքի 13-րդ հոդվածի 3-րդ մասով սահմանված այն դրույթին, որի համաձայն՝ ելնելով գնման առարկայի առանձնահատկությունից՝ դրանց հատկանիշները հնարավորինս ներառում են ձեռք բերվող ապրանքի, աշխատանքի կամ ծառայության որակին, ստանդարտին, անվտանգությանը, պայմանական նշաններին, տերմինաբանությանը, փաթեթավորմանը, բեռնաթափմանը, չափին, նախագծերին, ինչպես նաև գնման առարկայի այլ հատկանիշներին վերաբերող պայմանների հստակ նկարագրությունը՝ հիմնված միջազգային ստանդարտների և Հայաստանի Հանրապետությունում գործող նորմատիվատեխնիկական փաստաթղթերի, ստանդարտների, իսկ դրանց բացակայության դեպքում՝ ժամանակավոր տեխնիկական պայմանների վրա: Ընկերությունը հայտնել է, որ հրավերի վերոհիշյալ դրույթն արգելք է հանդիսանում բժշկական պարագաների ռադիացիոն մանրէազերծումը իոնիզացնող ճառագայթներով իրականացնող երկրորդ մեթոդով՝ «... էլեկտրոնների արագացուցիչներ, որոնք ստեղծում են (գեներացնում են) էլեկտրոնային կամ արգելակման ճառագայթման փնջեր...»-ով, ռադիացիոն մանրէազերծման ենթարկված «Դիալիզատոր» անվանումով ապրանքները առաջարկող հնարավոր մասնակիցների՝ այդ թվում նաև «Խաչպար» ՍՊԸ-ի համար՝ իրականացնելու «Գնումների մասին» ՀՀ օրենքի 7-րդ հոդված պահանջով սահմանված ցանկացած անձի՝ տվյալ դեպքում՝ «Խաչպար» ՍՊԸ-ի, գնման գործընթացին մասնակցելու հավասար իրավունք ունենալու սկզբունքը Հրավերի 3-րդ և 4-րդ չափաբաժինների մասով:

«Խաչպար» ՍՊԸ-ն, ղեկավարվելով «Գնումների մասին» ՀՀ օրենքի 46-րդ հոդվածի 1-ին մասով և 3-րդ մասի 1-ին կետով, բողոքարկում է Պատվիրատուի՝ «Սուրբ Գրիգոր Լուսավորիչ ԲԿ» ՓԲԸ-ի «ՍԳԼ-ԳՀԱՊՁԲ-20/23» ծածկագրով գնանշման հարցման

գնահատող հանձնաժողովի 2019թ. դեկտեմբերի 23-ի թիվ 1 որոշմամբ հաստատված՝ բժշկական նշանակության ապրանքների ձեռքբերման նպատակով հայտարարված «ՍԳԼ-ԳՀԱՊՁԲ-20/23» ծածկագրով գնանշման հարցման Հրավերի ընթացակարգը՝ Հրավերի թիվ 3-րդ և 4-րդ չափաբաժինների մասերով, և դիմելով ՀՀ գնումների հետ կապված բողոքներ քննող անձին, խնդրել է, ղեկավարվելով «Գնումների մասին» ՀՀ օրենքի 50-րդ հոդվածի 7-րդ մասով՝ ընդունել որոշում, որը կպարտավորեցնի «Սուրբ Գրիգոր Լուսավորիչ ԲԿ» ՓԲԸ-ի «ՍԳԼ-ԳՀԱՊՁԲ-20/23» ծածկագրով ընթացակարգի գնահատող հանձնաժողովին՝ ընդունելու որոշում նշված ծածկագրով գնանշման հարցման ընթացակարգում փոփոխություն կատարելու համար՝ հրավերի 3-րդ և 4-րդ չափաբաժինների մասով:

Ի լրումն բողոքի՝ Ընկերության կողմից 14.01.2020թ. ներկայացվել է գրություն, որով Ընկերությունը հայտնել է հետևյալը.

«ՍԳԼ-ԳՀԱՊՁԲ-20/23» ծածկագրով գնանշման հարցման Հրավերի «Տեխնիկական Բնութագիր - Գնման Ժամանակացույց» Հավելված թիվ 1-ի «անվանումը» սյունակներում 3-րդ չափաբաժնի մասով գրված է «Դիալիզատոր F-7HPS» անվանումը, իսկ 4-րդ չափաբաժնի մասով գրված է «Դիալիզատոր F-8HPS» անվանումը, որտեղ առկա «... F-7HPS» և «.... F-8HPS» արտահայտությունները ուղիղ հղումներ են պարունակում կոնկրետ «FRESENIUS MEDICAL CARE» արտադրողի կոնկրետ «F-7HPS» և «F-8HPS» մոդելների արտադրանքներին:

Համաձայն «Գնումների մասին» ՀՀ օրենքի 13-րդ հոդվածի 5-րդ մասով սահմանված պահանջների՝ գնման առարկայի հատկանիշները չպետք է պահանջ կամ հղում պարունակեն որևէ առևտրային նշանի, ֆիրմային անվանմանը, արտոնագրին, էսքիզին կամ մոդելին, ծագման երկրին կամ կոնկրետ աղբյուրին կամ արտադրողին, բացառությամբ այն դեպքերի, երբ անհնար է գնման առարկայի բնութագրումն առանց դրանց: Հղումներ օգտագործելու դեպքում հատկանիշների բնութագիրը պետք է պարունակի «կամ համարժեք» բառերը:

Պատվիրատուն ուղիղ հղում կատարելով կոնկրետ արտադրողի կոնկրետ արտադրանքին, չի կատարել Օրենքի 13-րդ հոդվածի 5-րդ մասով սահմանված պահանջը՝ գնման առարկայի բնութագրում չի ներառել «կամ համարժեք» բառերը:

Ընկերությունը կրկին պնդել է բողոքով ներկայացված պահանջը:

«Խաչապար» ՍՊԸ-ն, պատշաճ ծանուցված լինելով բողոքի քննության նպատակով 09.01.2020թ. ժամը 10:00-ին հրավիրված նիստի վերաբերյալ, ապահովել է իր ներկայացուցչի մասնակցությունը, ով պնդել է բողոքով ներկայացված դիրքորոշումը:

2. «Սուրբ Գրիգոր Լուսավորիչ ԲԿ» ՓԲԸ-ի կողմից բողոքի վերաբերյալ ներկայացված դիրքորոշումը և հիմնավորումները.

«Սուրբ Գրիգոր Լուսավորիչ ԲԿ» ՓԲԸ-ն Գնումների հետ կապված բողոքներ քննող անձին ուղղված 08.01.2020թ. թիվ 07 գրությամբ հայտնել է, որ «Խաչապար» ՍՊԸ-ի բողոքը հիմնավոր չէ՝ հետևյալ պատճառաբանությամբ.

«Գնումների մասին» ՀՀ օրենքի (հետայսու նաև՝ Օրենք) 13-րդ հոդվածի 1-3 մասերի համաձայն՝ Գնման առարկայի բնութագրերը պետք է ամբողջությամբ և հստակ նկարագրեն ձեռք բերվող ապրանքի, աշխատանքի կամ ծառայության հատկանիշները, դրանց ձեռքբերման և վճարման պայմանները՝ բացառելով տարակերպ մեկնաբանությունը: Գնման առարկայի բնութագրերը, որոնք ներառում են նաև պայմանագրի գինը, ընդգրկվում են պայմանագրում: Գնման առարկայի բնութագրերը պետք է մրցակցության հավասար պայմաններ ապահովեն հնարավոր մասնակիցների համար, չպետք է հանգեցնեն գնումների գործընթացում մրցակցության համար չհիմնավորված խոչընդոտների առաջացմանը, պետք է լինեն օբյեկտիվորեն հիմնավորված և համարժեք լինեն այն կարիքին, որի բավարարման նպատակով կատարվում է տվյալ գնումը:

Ելնելով գնման առարկայի առանձնահատկությունից՝ դրանց հատկանիշները հնարավորինս ներառում են ձեռք բերվող ապրանքի, աշխատանքի կամ ծառայության որակին, ստանդարտին, անվտանգությանը, պայմանական նշաններին, տերմինաբանությանը, փաթեթավորմանը, բեռնաթափմանը, չափին, նախագծերին, ինչպես նաև գնման առարկայի այլ հատկանիշներին վերաբերող պայմանների հստակ նկարագրությունը՝ հիմնված միջազգային ստանդարտների և Հայաստանի Հանրապետությունում գործող նորմատիվատեխնիկական փաստաթղթերի, ստանդարտների, իսկ դրանց բացակայության դեպքում՝ ժամանակավոր տեխնիկական պայմանների վրա:

«Սուրբ Գրիգոր Լուսավորիչ ԲԿ» ՓԲԸ-ի կարիքների համար բժշկական նշանակության ապրանքների ձեռքբերման նպատակով հայտարարված «ՍԳԼ-ԳՀԱՊՁԲ-20/23» ծածկագրով ընթացակարգի 3-4-րդ չափաբաժինների համար պահանջվող տեխնիկական բնութագրերը սահմանվել են հետևյալ կերպ.

3	Դիալիզատոր F-7HPS	Գերզտման գործակիցը մինչև 24մլ/ժամ մմ Hg, թաղանթի նյութը՝ սինթետիկ, արդյունավետ մակերեսը 1.6 (+-0.1)մ2, թաղանթի հաստությունը 30-40մկմ, ներքին տրամաչափը 200մկմ+-10%, լցման ծավալը մինչև 100մլ, մանրէազերծման մեթոդը շոգով կամ գամմա ճառագայթմամբ: Գործող՝ Fresenius Medical Care 4008S սարքի հետ համատեղելի: ISO և CE սերտիֆիկատների առկայությունը պարտադիր է:
4	Դիալիզատոր F-8HPS	Գերզտման գործակիցը մինչև 24մլ/ժամ մմ Hg, թաղանթի նյութը՝ սինթետիկ, արդյունավետ մակերեսը 1.4 (+-0.1)մ2, թաղանթի հաստությունը 30-40մկմ, ներքին տրամաչափը 200մկմ+-10%, լցման ծավալը մինչև 120մլ, մանրէազերծման մեթոդը շոգով կամ գամմա ճառագայթմամբ: Գործող՝ Fresenius Medical Care 4008S սարքի հետ համատեղելի: ISO և CE սերտիֆիկատների առկայությունը պարտադիր է:

Վերջիններս համապատասխանում են ինչպես «Գնումների մասին» ՀՀ օրենքի 13-րդ հոդվածի պահանջներին, այնպես էլ ՀՀ կառավարության 04.05.2017թ. N 526-Ն որոշմամբ հաստատված «Գնումների գործընթացի կազմակերպման» կարգի (հետայսու նաև՝ Կարգ) 22-րդ կետին, մասնավորապես գնման առարկայի բնութագրերը սահմանվել են հաշվի առնելով, որ դրանց պետք է բավարարեն մեկից ավելի հնարավոր մասնակիցներ և արտադրողներ:

Այն հանգամանքը, որ 3-րդ չափաբաժնի մասով հայտ է ներկայացրել 1-ից ավելի մասնակից («Ֆրեզեն» ՍՊԸ, «Վերիտաս» ՍՊԸ, «Նատալի Ֆարմ» ՍՊԸ) հաստատում է տեխնիկական բնութագրերի մրցակցային և գնումների մասին ՀՀ օրենսդրությանը համապատասխան լինելը:

Ինչպես նաև հատկանշական է, որ օրենսդիրը սահմանում է պայման, որ պետք է մասնակցեն մեկից ավելի մասնակիցներ, այլ ոչ թե պետք է պարտադիր ապահովվի «Իսաչպար» ՍՊԸ-ի մասնակցության հնարավորությունը:

Պատվիրատուն ապահովել է մեկից ավելի ընկերությունների մասնակցության հնարավորություն, որի արդյունքում էլ ներկայացվել է թվով 3 հայտ և մինչ բանակցային գործընթացի սկիզբը, արդեն իսկ ապահովված է շուրջ 40 տոկոս խնայողություն:

Ընկերությունը նշել է, որ Պատվիրատուն խախտել է «Գնումների մասին» ՀՀ օրենքի 13-րդ հոդվածի 3-րդ կետը, մինչդեռ ներկայացված միջազգային ստանդարտում

ներկայացված են ռադիացիոն մանրէազերծման մեթոդները, դրանց կիրառման պայմանները և պահանջները: Համաձայն ГОСТ 8.651-2016 ստանդարտի՝ գոյություն ունի ռադիացիոն մանրէազերծման երկու մեթոդ՝ գամմա ճառագայթման աղբյուրներ կամ էլեկտրոնների արագացուցիչներ, որոնք ստեղծում են էլեկտրոնային կամ արգելափակման ճառագայթման փնջեր:

Հատկանշական է, որ սահմանվել է երկու մեթոդ՝ կիրառելով «կամ» շաղկապը, որը հնարավորություն է տալիս ընտրել այդ մեթոդներից որևէ մեկը, այլ ոչ թե պարտադիր կերպով երկուսն էլ:

Պատվիրատուն նշել է նաև, որ որևէ միջազգային ստանդարտ չի կարող պարտադրել տեխնիկական բնութագրի ձևաչափ, քանի որ Կարգի 11-րդ կետի համաձայն՝ գնման հայտը (որի մեջ ներառված նաև տեխնիկական բնութագիրը) կազմում և հաստատում է պատվիրատուի պատասխանատու ստորաբաժանումը՝ հնարավորինս ներառելով ձեռքբերվող ապրանքի, աշխատանքի կամ ծառայության որակին, ստանդարտին, անվտանգությանը, պայմանական նշաններին, տերմինաբանությանը, փաթեթավորմանը, բեռնաթափմանը, չափին, նախագծերին, ինչպես նաև գնման առարկայի այլ հատկանիշներին վերաբերող պայմանների հստակ նկարագրությունը՝ հիմնված միջազգային ստանդարտների և Հայաստանի Հանրապետությունում գործող նորմատիվատեխնիկական փաստաթղթերի, ստանդարտների, իսկ դրանց բացակայության դեպքում՝ ժամանակավոր տեխնիկական պայմանների վրա:

Պատվիրատուն հայտնել է նաև, որ տեխնիկական բնութագրերը կազմվել են հիմք ընդունելով ՀՀ առողջապահության նախարարության կողմից կազմված և շրջանառված հեմոդիալիզի պարագաների տեխնիկական բնութագրերին ներկայացվող նվազագույն պահանջները:

Ելնելով վերոգրյալից՝ Պատվիրատուն գտնում է, որ Ընկերության բողոքն անհիմն է և ենթակա է մերժման:

Պատվիրատուն, պատշաճ ծանուցված լինելով բողոքի քննության նպատակով 09.01.2020թ. ժամը 10:00-ին հրավիրված նիստի վերաբերյալ, ապահովել է իր ներկայացուցիչների մասնակցությունը, ովքեր պնդել են վերոհիշյալ գրությամբ ներկայացված դիրքորոշումը:

3. ԳԲՔԱ-ՆԳ-2019/98 բողոքի քննության համար էական նշանակություն ունեցող փաստերը

ԳԲՔԱ-ՆԳ-2019/98 բողոքի քննության համար էական նշանակություն ունեն հետևյալ փաստերը՝

1. «Սուրբ Գրիգոր Լուսավորիչ ԲԿ» ՓԲԸ-ի կողմից իր կարիքների համար հայտարարվել է «ՍԳԼ-ԳՀԱՊՁԲ-20/23» ծածկագրով գնանշման հարցման ընթացակարգ:

2. Ընթացակարգի հրավերով հաստատվել է գնման առարկայի տեխնիկական բնութագիրը:

4. ՀՀ գնումների հետ կապված բողոքներ քննող անձի հիմնավորումները և եզրահանգումը.

ՀՀ գնումների հետ կապված բողոքներ քննող անձ Գրիգոր Ներսիսյանս, ուսումնասիրելով «Խաչպար» ՍՊԸ-ի կողմից 25.12.2019թ. ներկայացված բողոքը, ի լրումն բողոքի 14.01.2020թ. ներկայացված գրությունը, «Սուրբ Գրիգոր Լուսավորիչ ԲԿ» ՓԲԸ-ի 08.01.2020թ. թիվ 07 գրությունը, «ՍԳԼ-ԳՀԱՊՁԲ-20/23» ծածկագրով ընթացակարգի հրավերը, հայտնում եմ հետևյալը.

«Գնումների մասին» ՀՀ օրենքի 3-րդ հոդվածի 1-ին և 2-րդ մասերի համաձայն՝ սույն օրենքի նպատակն է ապահովել գնումների գործընթացում հատուցման դիմաց արժեք, այն է՝

1) պատվիրատուին վերապահված լիազորությունների կատարման համար անհրաժեշտ՝ կարիքին համապատասխան ապրանքների, աշխատանքների և ծառայությունների ձեռքբերում՝ համարժեք հատուցմամբ.

2) գնումների և գնումների գործընթացի տնտեսող, արդյունավետ և օգտավետ իրականացում:

2. Գնումների գործընթացը հիմնվում է հետևյալ սկզբունքների վրա.

1) գնման գործընթացի միասնական կանոններով մրցակցային, թափանցիկ, համաչափ, հրապարակային և ոչ խտրական հիմունքներով կազմակերպում.

2) պայմանագրի կնքման նպատակով մասնակիցների շրջանակի ընդլայնում և նրանց միջև մրցակցության խրախուսում.

3) ցանկացած անձի համար, անկախ նրա օտարերկրյա ֆիզիկական անձ, կազմակերպություն կամ քաղաքացիություն չունեցող անձ լինելու հանգամանքից, գնման գործընթացին մասնակցելու իրավահավասարություն:

Օրենքի 13-րդ հոդվածի 1-ին, 2-րդ, 3-րդ և 5-րդ մասերի համաձայն՝

1. Գնման առարկայի բնութագրերը պետք է ամբողջությամբ և հստակ նկարագրեն ձեռք բերվող ապրանքի, աշխատանքի կամ ծառայության հատկանիշները, դրանց ձեռքբերման և վճարման պայմանները՝ բացառելով տարակերպ մեկնաբանությունը: Գնման առարկայի բնութագրերը, որոնք ներառում են նաև պայմանագրի գինը, ընդգրկվում են պայմանագրում:

2. Գնման առարկայի բնութագրերը՝

1) պետք է մրցակցության հավասար պայմաններ ապահովեն հնարավոր մասնակիցների համար.

2) չպետք է հանգեցնեն գնումների գործընթացում մրցակցության համար չհիմնավորված խոչընդոտների առաջացմանը.

3) պետք է լինեն օբյեկտիվորեն հիմնավորված և համարժեք լինեն այն կարիքին, որի բավարարման նպատակով կատարվում է տվյալ գնումը.

4) ներառում են գնման առարկայի մասնագրի, տեխնիկական տվյալների, իսկ աշխատանքների դեպքում՝ նաև աշխատանքների ծավալաթերթի, ժամանակացույցի և այլ ոչ գնային պայմանների ամբողջական և համարժեք նկարագրությունը:

3. Ելնելով գնման առարկայի առանձնահատկությունից՝ դրանց հատկանիշները հնարավորինս ներառում են ձեռք բերվող ապրանքի, աշխատանքի կամ ծառայության որակին, ստանդարտին, անվտանգությանը, պայմանական նշաններին, տերմինաբանությանը, փաթեթավորմանը, բեռնաթափմանը, չափին, նախագծերին, ինչպես նաև գնման առարկայի այլ հատկանիշներին վերաբերող պայմանների հստակ նկարագրությունը՝ հիմնված միջազգային ստանդարտների և Հայաստանի Հանրապետությունում գործող նորմատիվատեխնիկական փաստաթղթերի, ստանդարտների, իսկ դրանց բացակայության դեպքում՝ ժամանակավոր տեխնիկական պայմանների վրա:

5. Գնման առարկայի հատկանիշները չպետք է պահանջ կամ հղում պարունակեն որևէ առևտրային նշանի, ֆիրմային անվանմանը, արտոնագրին, էսքիզին կամ մոդելին,

ծագման երկրին կամ կոնկրետ աղբյուրին կամ արտադրողին, բացառությամբ այն դեպքերի, երբ անհնար է գնման առարկայի բնութագրումն առանց դրանց: Հղումներ օգտագործելու դեպքում հատկանիշների բնութագիրը պետք է պարունակի «կամ համարժեք» բառերը:

ՀՀ կառավարության 04.05.2017թ. N 526-Ն որոշմամբ հաստատված «Գնումների գործընթացի կազմակերպման» կարգի (հետայսու նաև՝ Կարգ) 22-րդ կետի համաձայն՝ գնման առարկայի բնութագրերը և մասնակիցների որակավորման հատկանիշների գնահատմանը ներկայացվող չափանիշները սահմանելիս պետք է հաշվի առնել, որ դրանց պետք է բավարարեն մեկից ավելի հնարավոր մասնակիցներ և արտադրողներ՝ բացառությամբ օրենքի 23-րդ հոդվածի 1-ին մասի 1-ին կետով նախատեսված պայմաններով գնում կատարելու դեպքերի:

«Սուրբ Գրիգոր Լուսավորիչ ԲԿ» ՓԲԸ-ի կողմից իր կարիքների համար բժշկական նշանակության ապրանքների ձեռքբերման նպատակով հայտարարվել է «ՍԳԼ-ԳՀԱՊԶԲ-20/23» ծածկագրով գնանշման հարցման ընթացակարգ:

Ընթացակարգի հրավերով 3-րդ և 4-րդ չափաբաժինների մասով հաստատվել են գնման առարկայի հետևյալ տեխնիկական բնութագրերը.

3	Դիալիզատոր F-7HPS	Գերզտման գործակիցը մինչև 24մլ/ժամ մմ Hg, թաղանթի նյութը՝ սինթետիկ, արդյունավետ մակերեսը 1.6 (+-0.1)մ2, թաղանթի հաստությունը 30-40մկմ, ներքին տրամաչափը 200մկմ+10%, լցման ծավալը մինչև 100մլ, մանրէազերծման մեթոդը շոգով կամ գամմա ճառագայթմամբ : Գործող՝ Fresenius Medical Care 4008S սարքի հետ համատեղելի: ISO և CE սերտիֆիկատների առկայությունը պարտադիր է:
4	Դիալիզատոր F-8HPS	Գերզտման գործակիցը մինչև 24մլ/ժամ մմ Hg, թաղանթի նյութը՝ սինթետիկ, արդյունավետ մակերեսը 1.4 (+-0.1)մ2, թաղանթի հաստությունը 30-40մկմ, ներքին տրամաչափը 200մկմ+10%, լցման ծավալը մինչև 120մլ, մանրէազերծման մեթոդը շոգով կամ գամմա ճառագայթմամբ : Գործող՝ Fresenius Medical Care 4008S սարքի հետ համատեղելի: ISO և CE սերտիֆիկատների առկայությունը պարտադիր է:

Այսպիսով՝ «Խաչպար» ՍՊԸ-ն բողոքի առաջին մասով պնդել է, որ գնման առարկայի տեխնիկական բնութագիրն ամբողջությամբ չի նկարագրում ձեռքբերվող ապրանքը և այն հակասում է «Գնումների մասին» ՀՀ օրենքի 13-րդ հոդվածի պահանջներին, քանի որ նշվել է մանրէազերծման ռադիացիոն մեթոդի միայն մեկ տեսակը՝ գամմա ճառագայթմամբ, սակայն չի նշվել երկրորդ մեթոդը՝ էլեկտրոնների արագացուցիչներ, որոնք ստեղծում են էլեկտրոնային կամ արգելակման ճառագայթման փնջեր:

Այս տեսանկյունից արձանագրում եմ հետևյալը. Ընթացակարգի հրավերի տեխնիկական բնութագրով 3-րդ և 4-րդ չափաբաժինների համար նախատեսվել է մանրէազերծման մեթոդի երկու տեսակ՝ **մանրէազերծման մեթոդը շոգով կամ գամմա ճառագայթմամբ՝ հնարավորություն ընձեռնելով մասնակցին առաջարկել նշված երկու մեթոդներից որևէ մեկը:**

Իր հերթին գամմա ճառագայթմամբ մանրէազերծումը հանդիսանում է մանրէազերծման ռադիացիոն մեթոդի տարատեսակ: Ընկերությունը պնդում է, որ ռադիացիոն մանրէազերծման մյուս մեթոդը չմատնանշելը հանգեցնում է գնման առարկայի ամբողջական նկարագրված լինելու պահանջի խախտման: Այս տեսանկյունից, ուսումնասիրելով Ընկերության կողմից ներկայացված փաստարկները, գտնում եմ, որ դրանք անհիմն են, քանի որ նախ՝ հրավերով սահմանվել է մանրէազերծման երկու կամընտրային մեթոդ, որն ընդլայնում է առաջարկվող ապրանքների շրջանակը, մյուս կողմից ռադիացիոն մեթոդներից որևէ մեկը մատնանշելը չի կարող դիտարկվել որպես խտրական, քանի որ նշված երկու մեթոդների միաժամանակյա առկայությունը պարտադիր պահանջ չէ: Տեխնիկական բնութագրում մանրէազերծման մեթոդը նշելը չի կարող դիտարկվել որպես խտրական պահանջ, քանի որ գնման առարկայի հատկանիշները պետք է հնարավորինս ներառեն ձեռք բերվող ապրանքի հատկանիշներին վերաբերող պայմանների հստակ նկարագրությունը, որը բխում է պատվիրատուի գնման պահանջից: Նշված պահանջի սահմանումը չի խախտում «Գնումների մասին» ՀՀ օրենքի 13-րդ հոդվածի, հատկապես 5-րդ մասի պահանջները:

Դրա հետ մեկտեղ գնումների և գնումների գործընթացի իրականացման կարևորագույն սկզբունքներից է հանդիսանում գնման արդյունավետ և օգտավետ իրականացումը, հետևաբար պատվիրատուի կողմից իրականացվող գնումը պետք է լիարժեք համապատասխանի վերջինիս գնման պահանջին և ապահովվի պատվիրատուի այն կարիքի բավարարումը, որի նպատակով կազմակերպվել է նշված գնումը և միևնույն ժամանակ չհակասի «Գնումների մասին» ՀՀ օրենքի 3-րդ և 13-րդ հոդվածների պահանջներին:

Տվյալ դեպքում արձանագրում եմ, որ գնման առարկայի մանրէազերծման մեթոդի մատնանշումը չի հակասում Օրենքի 13-րդ հոդվածի պահանջներին:

Ուսումնասիրելով «Խաչպար» ՍՊԸ-ի կողմից բողոքի երկրորդ մասով ներկայացված փաստարկները, գտնում եմ, որ դրանք հիմնավոր են, հետևյալ պատճառաբանությամբ.

«Գնումների մասին» ՀՀ օրենքի 13-րդ հոդվածի 5-րդ մասը սահմանում է, որ գնման առարկայի հատկանիշները չպետք է պահանջ կամ **հղում պարունակեն որևէ առևտրային նշանի, ֆիրմային անվանմանը, արտոնագրին, էսքիզին կամ մոդելին, ծագման երկրին կամ կոնկրետ աղբյուրին կամ արտադրողին, բացառությամբ այն դեպքերի, երբ անհնար է գնման առարկայի բնութագրումն առանց դրանց: Հղումներ օգտագործելու դեպքում հատկանիշների բնութագիրը պետք է պարունակի «կամ համարժեք» բառերը:**

Ուսումնասիրելով Ընթացակարգի 3-րդ և 4-րդ չափաբաժինների գնման առարկաների տեխնիկական բնութագրերը, գտնում եմ, որ դրանք խախտում են Օրենքի 13-րդ հոդվածի 5-րդ մասի պահանջները հետևյալ մասով. գնման առարկայի հատկանիշները պարունակում են հղում կոնկրետ մոդելին, որն էլ իր հերթին արտադրվում է միայն մեկ արտադրողի կողմից: Մասնավորապես՝ գնման առարկայի անվանումը նշվել է «**Դիալիզատոր F-7HPS**» և «**Դիալիզատոր F-8HPS**», որոնց մասով արձանագրում եմ, որ նշված անվանման մեջ «**F-7HPS**» և «**F-8HPS**» բառերը բնութագրում են **դիալիզատորի կոնկրետ մոդելներ, որոնք արտադրվում են «Ֆրեսենիուս Մեդիքալ Քեար» ընկերության կողմից**, ուստի հիմք ընդունելով Օրենքի 13-րդ հոդվածի 5-րդ մասի պահանջը, արձանագրում եմ, որ նման դեպքերում տեխնիկական բնութագիրը պետք է պարունակի «կամ համարժեք» բառերը:

Այսպիսով՝ հաշվի առնելով վերոգրյալը, գտնում եմ, որ «Խաչպար» ՍՊԸ-ի կողմից ներկայացված բողոքը սույն մասով հիմնավոր է և «ՍԳԼ-ԳՀԱՊՁԲ-20/23» ծածկագրով գնանշման հարցման ընթացակարգի 3-րդ և 4-րդ չափաբաժինների տեխնիկական բնութագրում վերոհիշյալ կետով պետք է կատարվի փոփոխություն և տեխնիկական բնութագիրը պետք է համապատասխանեցվի «Գնումների մասին» ՀՀ օրենքի 13-րդ հոդվածի 5-րդ մասի պահանջներին:

Ելնելով վերոգրյալից և ղեկավարվելով «Գնումների մասին» ՀՀ օրենքի 50-րդ հոդվածի 7-րդ մասով՝

Ո Ր Ո Շ Ե Ց Ի

«Խաչպար» ՍՊԸ-ի կողմից 25.12.2019թ. ներկայացված բողոքը բավարարել.

Պարտավորեցնել «ՍԳԼ-ԳՀԱՊՁԲ-20/23» ծածկագրով գնանշման հարցման ընթացակարգի գնահատող հանձնաժողովին ընթացակարգի հրավերի տեխնիկական բնութագրում 3-րդ և 4-րդ չափաբաժինների մասով կատարել սույն որոշման մեջ նշված փոփոխությունները:

ՀՀ գնումների հետ կապված բողոքներ քննող անձի որոշումն իրավապարտադիր է և ուժի մեջ է մտնում տեղեկագրում հրապարակվելու հաջորդ օրը:

ՀՀ գնումների հետ կապված բողոքներ քննող անձի որոշումը կարող է փոփոխվել կամ վերացվել, այդ թվում՝ մասնակի, միայն դատարանի կողմից:

Գնումների հետ կապված
բողոքներ քննող անձ՝



ԳՐԻԳՈՐ ՆԵՐՍԻՍՅԱՆ